

Definitivamente nan no ta participa na Calypso organisa pa SAC MUSICA kier organisa evento propio na San Nicolas otro siman

ORANJESTAD – Mientras cu a confirma ayera cu nan no ta participa na e Calypso y Roadmarch Contest di SAC e siman aki, e fundacion MUSICA a inicia proceso pa organisa nan propio evento musical otro siman cu un posibel fecha di 9 di februari y si por, na San Nicolas. Presidente di MUSICA Hilduard Croes a confirma na BONDIA ARUBA cu nan a tuma un posicion ayera cu nan no ta papia mas cu SAC debi cu tur deadline a pasa y cu no tabatin sentido sigui mas. E hecho cu SAC a habri e inscripcion atrobe, no a cambia nan opinion y como tal ta para ariba cu nan no ta participa definitivamente na e festival di SAC. E hecho cu diripiente ayera merdia varios banda a

dicidi cu nan ta participa toch na e festival, ta pleno derecho di e bandanan segun Croes. Contrario na pensamiento erroneo, e bandanan ey, no ta pertenece na MUSICA y como tal no por papia cu e bandanan a distancia nan mes for di e asociacion segun Croes.

Segun Croes, e intencion ta aworaki pa tene un evento magno dia 9 di februari awor, unda cu tur e bandanan di MUSICA lo participa y lo mester tuma lugar na San Nicolas. E hecho cu tin mas actividad programa caba pa e fecha ey, manera Hebbe Hebbe y Carubian Festival ta berdad pero a purba haya e fecha di dia 10, pero debi cu SAC a keda rek e asunto, no por a logra algo asina.

Croes ta muestra cu nan ta optimista y no por kere cu un hende na Aruba lo kier stroba nan di tene un evento asina grandi unda cu ta considera esaki como e evento mas grandi pa loke ta exponentenan di Calypso na Aruba, di tuma lugar. Y si no haya e permiso, no tin evento y esei ta e realidad segun Croes.

Pero nan ta sali di punto di bista cu e lo bira realidad y cu e por bira un contest of simplemente un festival di musica di Carnaval. E decision ey, no a cai ainda. Prome mester keda cla cu e proceso pa haya e permisonan necesario pa tene e evento aki, segun Croes. □



Presidente di MUSICA Hilduard Croes

SAC y MUSICA tabata mas lew di otro cu nunca

ORANJESTAD – SAC ta sigui cu su festival di Calypso, asociacion di musico MUSICA lo ta organisando su propio actividad musical, y e comunidad ta mas confuso cu nunca. Esaki tabata e situacion gran parti di dia ayera den un siman cu a lanta mas confusion cu nunca debi na un impasse cu tabata inicialmente algo 'simple' entre musiconan y SAC. Mientras cu SAC a dicidi diadomingo anochi cu nan ta habri inscripcion pa tur banda por participa entrante ayera mainta, cu deadline te 7'or di anochi, musiconan a bin cu un otro informacion unda cu nan ta pone SAC un banda, y a dicidi di bin cu nan propio

actividad musical cu un fecha tentativo.

Consecuencia di esaki tabata un sin fin di rumor y informacion cu tabata sali di tur banda. Algun banda manera Youth Extreme a dicidi cu nan no ta mira problema pa inscribi, mientras cu nan tabata parti di e union di bandanan. Gobierno di su banda a manda su vocero clarifica den oranan di merdia, den persona di Lysandro Besselink, cu no tin ningun permiso otorga pa Gobierno di Aruba pa un posibel evento nobo cu fecha di dia 9 di februari 2012.

Mes momento reunionnan tabata tuma lugar ainda di tanto musico, Gobierno

y SAC, unda cu ningun hende no a bin afo oficialmente declarando cu tin sea permiso, fecha y luga pa organisa cualkier otro evento. E unico informacion cu tabata sigui valido tabata esun di SAC programa pa dia 4 di februari 2012.

Tur otro evento tabata 'fantasma' ainda ya cu ningun tabata confirma cu permiso den man, y un luga concreto pa por tene e evento. Tur esaki a crea mas combersacion, rumor y discusion rond pasobra no por a haya ningun hende pa papia. Esaki tabata e desaroyo cronologico di actividad rond di henter e asunto di Calypso Contest. □